

Was ferra März

Ja, was ferra März! Der iss vunn Oofong oo bis jetzt ze kalt gewese unn dess merke nitt nor mir Mensche, naa, aach die Omsele fühle sich nitt wohl unn wolle gar nitt ihrn Schnawwel zum Singe uffmache. Su um die Zeit sinn aach die Schwalwe unn die Mauerseeschler zurigg kumme, geseh habb isch die noch nitt. Awwer dess kann soi, weil merr sisch aach kaum e Stunn uff die Terrass setze unn in die Luft gugge kann, ess iss oofach ze kalt deferr.

Doo freit merr sisch trotz dere Kält ze lese, dass die Störch im Ried, su hinner Trewwer bis hie nooch Büttelborn, sich widder oigefunne unn ze klappern oogefonge hawwe. Doo isses aach e bissi traurisch ze erfahrr, dass zwaa vunn dene in unsere Geeschend doot uffgefunde worrn sinn, unner Starkstrommaste, weil se dort mett ihrne Flitsch su e Stromkabel beriehr hawwe.

Merr wunnert sisch schunn, dass die Störch sisch grad su Maste aussuche, um druff ihrn Horst ze baue. Isch kann merr dess nor erklärr, weil die Störch halt Koloniebrüter sinn unn wonn immer ess gieht gern noh beienonner ihr Nester baue, dess kenne se halt uff so Maste gons gut.

Irschendwo su geesche Massenem hieh hott merr uff alloo stiehende Stonge su Rädder als Nisthilfe ferra Störch platziert. Die werra awwer nitt oogenumme, weil wie gesaad jed Storchepaar Gesellschaft brauch. Dess kann merr sisch gut im Internet oogugge, wenn merr „Storchendorf Rühstädt“ oogligge dut unn sehe kann, wie die Störch Nest newer Nest uff Hausdächer gebaut hawwe. Also wärs gons gut, nitt oonzelne Stonge, sonnern e Grupp vunn Stonge uffzestelle, vil-leischd dut dess die Störch oolocke.

Gons sicher sinn frieher aach im alde Flerschem Storchener gewese, awwer doodroo kann isch misch nitt erinnern. Wenn dess su gewese iss als mir Kinner warn, donn waaß isch dess nitt, weil mir Buwe hawwe rund um die Galluskersch liewer Räuwer unn Schandarm gespild als nooch de Veeschel geguggd. Unn ob alle paar Johr de März su kalt wie jetzt gewese iss, dess waaß isch aach nimmi.

Eiern Honnes